



Sabtu, 09 Januari 2021

Ogen: 1 Kronika 12:16-18



Teman Sinampati



Berperanglah melawan sifat burukmu, berdamailah dengan tetangga dan biarlah setiap tahun yang baru mencarikanmu orang yang lebih baik. Kata enda isehken Benyamin Franklin jadi kata motivasi simbelin tujunna jadi perenungen ras perayaken man manusia gelah geluhna lebih mehuli wari ku wari. Kecibal ras biak geluh manusia erbagebage, mehuli ras jahat lit i bas pusuh janah enda enggo kin lit nai nari bagepe janah e mbelin ipengaruhi ras ise ia erteman. Emaka kita arus erperang guna ngelawan ras naluken biak-biak si banci ncedai dirinta ras kalak sideban si isekelewetta. Terdauhen selain naluken biak si la uli e salah sadana nggit erdamai ras kalak sideban alu bage reh tambah-tambahna temanta kalak si mehuli. Janah si enda erbahan kita nggeluh dengen ertaman ras kalak si mehuli si mahan bana geluhta pe reh ulina.

Enda me si jadi arapen anak-anak Dibata, Moria GBKP, reh tambah wari, bulan dengen ku tahunna pe selaku sekalak diberu, ndehara, nande, nini, bibi, cimbang, beru kita banci jadi teman si mehuli man kalak sideban.

Renungenta sendah eme kerna turi-turin Daud i bas mimpin bangsa Isael, sada persada suku Israel reh ndahi ia dengen mere diri jadi teman guna nampati ia. Emaka i bas percakapen enda isungkun Daud suku Benyamin ras Juda si reh ndahi ia ku benteng ingan Daud tading. Daud nungkun kerehenna selaku teman ntaah imbang. Adi teman, tentuna alu dem keriahen ukur ialo-alo Daud ia tapi dikune imbang amin labo lit perbahanen Daud si jahat man bana kerina, alu tegas ikataken Daud maka Dibata me singukum ia kerina. Emaka iakuken kalak si reh e maka kerehenna guna jadi teman ras nampati Daud. Mari kita kerina, i bas ndalani tahun enda si pebuelah temanta dengen jadilah teman man kalak sideban.

 *Berelah dirinta jadi teman guna nampati kalak sideban*